

神異典第三百十三卷

異境部彙考

易經緯 龍魚河圖

元洲在北海中地方三十里去南岸十萬里有芝草元澗澗水如蜜味服之長生

列子 黃帝篇

列姑射山在海河洲中山上有神人焉吸風飲露不食五穀心如淵泉形如處女不偃不愛仙聖爲之臣不畏不怒愿憇爲之使不施不惠而物自足不聚不斂而已無愆陰陽常調日月常明四時常若風雨常均字育常時年穀常豐而土無札傷人無天惡物無疵厲鬼無靈響焉

湯問篇

渤海之東不知其幾億萬里有大壑焉實惟無底之谷其下無底名曰歸墟八紘九野之水天漢之流莫不注之而無增無減焉其中有五山焉一曰岱輿二曰員嶠三曰方壺四曰瀛洲五曰蓬萊其山高下周旋三萬里其頂平處九千里山之中間相去七萬里以爲鄰居焉其上臺觀皆金玉其上

禽獸皆純縞珠玕之樹皆叢生華實皆有滋味食之皆不死所居之人皆仙聖之種一日一夕飛相往來者不可數焉而五山之根無所連著常隨潮汐上下往還不得暫時爲仙聖毒之訴之於帝帝恐流於西極失羣聖之居乃命禹疆使巨鼈十五舉首而戴之迭爲三番六萬歲一交焉五山始峙而龍伯之國有大人舉足不盈數步而暨五山之所一釣而連六鰲合負而趣歸其國灼其骨以數焉於是岱輿員嶠二山流於北極沈於大海仙聖之播遷者巨億計帝憑怒侵滅龍伯之國使阨侵小龍伯之民使短至伏羲神農時其國人猶數千丈

史記 封禪書

威宣燕昭使人入海求蓬萊方丈瀛洲此三神山者其傳在渤海中去人不遠患且至則船風引而去蓋嘗有至者諸仙人及不死之藥皆在焉其物禽獸盡白而黃金銀爲宮闕未至望之如雲及到三神山反居水下臨之風輒引去終莫能至云

淮南子 墜形訓

縣圃涼風樊桐在崑崙閭闔之中是其疏圃疏圃之池浸之黃水黃水三周復其原是謂丹水飲之

不死崑崙之丘或上倍之是謂涼風之山登之而不死或上倍之是謂縣圃登之乃靈能使風雨或上倍之乃維上天登之乃神是爲大帝之宮

神異經 中荒經

東方有宮青石爲牆高三仞左右闕高百尺畫以五色門有銀榜以青石碧鏤題曰天地長男之宮西方有宮白石爲牆五色元黃門有金榜而銀鏤題曰天地少女之宮中央有宮以金爲牆門有金榜以銀鏤題曰天皇之宮南方有宮以赤石爲牆赤銅爲門闕有銀榜曰天皇中女之宮北方有宮以黑石爲牆題曰天地中男之宮東南有宮黃石爲牆黃榜碧鏤題曰天地少男之宮西北有宮黃銅爲牆題曰地皇之宮 東方裔外東明山有宮以青石爲牆西方裔外大夏山有宮以金爲牆南方裔外岡明山有宮以赤石爲牆西南裔外老壽山有宮以黃銅爲牆東南裔外閼清山有宮以青石爲牆西北裔外西明山有宮以白石爲牆 東北有鬼星石室三百戶共一門石榜題曰鬼門西南銅關夾門榜題曰人往門東北銅關夾門榜題曰人來門 鬼門晝日不開至暮卽有人語有青火色

海內十洲記 祖洲

祖洲近在東海之中地方五百里去西岸七萬里有不死之草草形如菰苗長三四尺人已死三日者以草覆之皆當時活也服之令人長生昔秦始皇大苑中多枉死者橫道有鳥如烏狀銜此草覆死人面當時起坐而自活也有司奏聞始皇遣使者齋草以問北郭鬼谷先生鬼谷先生云此草是東海祖洲上有不死之草生瓊田中或名爲養神芝其葉似菰苗叢生一株可活一人始皇於是慨然曰可採得否乃使使者徐福發童男童女五百人率攝樓船等入海尋祖洲遂不返福道士也字君房後亦得道也

瀛洲

瀛洲在東海中地方四千里大抵是對會稽去西岸七十萬里上生神芝仙草又有玉石高且千丈出泉如酒味甘名之爲玉醴泉飲之數升輒醉令人長生洲上多仙家風俗是吳人山川如中國也

元洲

元洲在北海之中戊亥之地地方七千一百里去南岸三十六萬里有太元都仙伯真公所治多

丘山又有風山聲響如雷電對天西北門上多太元仙宮宮室宮室各異鑊金芝玉草乃是三天君下治之處甚肅肅也

炎洲

炎洲在南海中地方二千里去北岸九萬里有風生獸似豹青色大如狸張網取之積薪數車以燒之薪盡而獸不然灰中而立毛亦不焦斫刺不入打之如灰囊以鐵鎚鍛其首數十下乃死而張口向風須臾復活以石上菖蒲塞其鼻卽死取其腦和菊花服之盡十斤得壽五百年又有火林山中自有火光獸大如鼠毛長三四寸或赤或白山可三百里許晦夜卽見此山林乃是此獸光照狀如火光相似取其獸毛以緝爲布時人號爲火浣布此是也國人衣服垢污以灰汁浣之終無潔淨唯火燒此衣服兩盤飯間振擺其垢自落潔白如雪亦多仙家

長洲

長洲一名青丘在南海辰巳之地地方各五千里去岸二十五萬里上饒山川及多大樹樹乃有二千圍者一洲之上專是林木故一名青丘又有仙草靈藥甘液玉英靡所不有又有風山山恒震聲

有紫府宮天真仙女遊於此地

元洲

元洲在北海中地方三千里去南岸十萬里上有五芝元澗澗水如蜜漿飲之長生與天地相畢服此五芝亦得長生不死亦多仙家

流洲

流洲在西海中地方三千里去東岸十九萬里上多山川積石名爲昆吾冶其石成鐵作劍光明洞照如火晶狀割玉物如割泥亦饒仙家

生洲

生洲在東海丑寅之間接蓬萊十七萬里地方二千五百里去西岸二十三萬里上有仙家數萬天氣安和芝草常生地無寒暑安養萬物亦多山川仙草衆芝一洲之水味如飴酪至良洲者也

鳳麟洲

鳳麟洲在西海之中央地方一千五百里洲四面有弱水繞之鴻毛不浮不可越也洲上多鳳麟數

萬各爲羣又有山川池澤及神藥百種亦多仙家煮鳳喙及麟角合煎作膏名之爲續絃膠或名連金泥此膠能續弓弩已斷之絃刀劍斷折之金更以膠連續之使力士掣之他處乃斷所續之際終無斷也武帝天漢二年帝幸北海祠恆山四月西國王使至獻此膠四兩吉光毛裘武帝受以付外庫不知膠裘二物之妙用也以爲西國雖遠而止貢者不奇稽留使者未遣又時武帝幸華林園射虎而弩絃斷使者時從駕又上膠一分使口濡以續弩絃帝驚曰異物也乃使武士數人共對掣引之終日不脫如未續時也膠色青如碧玉吉光毛裘黃色蓋神馬之類也裘入水數日不沉入火不焦帝於是乃悟厚謝使者而遣去賜以牡桂乾薑等諸物是西方國之所無者又益思東方朔之遠見周穆王時西胡獻毘吾割玉刀及夜光常滿杯刀長一尺杯受三升刀切玉如切泥杯是白玉之精光明夜照冥夕出杯於中庭以向天比明而水汁已滿於杯中也汁甘而香美斯實靈人之器秦始皇時西胡獻切玉刀無復常滿杯耳如此膠之所出從鳳麟洲來劍之所出必從流洲來並是西海中所有也

聚窟洲

聚窟洲在西海中申未之地地方三千里北接崑崙二十六萬里去東岸二十四萬里上多真仙靈官宮第比門不可勝數及有獅子辟邪鑿齒天鹿長牙銅頭鐵額之獸洲上有大山形似人鳥之象因名之爲神鳥山山多大樹與楓水相類而花葉香聞數百里名爲返魂樹扣其樹亦能自作聲聲如羣牛吼聞之者皆心震神駭伐其木根心於玉釜中煮取汁更微火煎如黑錫狀令可丸之名曰驚精香或名之爲震靈丸或名之爲返生香或名之爲震檀香或名之爲人鳥精或名之爲却死香一種六名斯靈物也香氣聞數百里死者在地聞香氣乃却活不復亡也以香薰死人更加神驗征和二年武帝幸安定西胡月支國王遣使獻香四兩大如雀卵黑如桑椹帝以香非中國所無以付外庫又獻猛獸一頭形如五六十日犬子大似狸而色黃命國使將入呈帝見之使者抱之似犬羸細禿悴尤怪其名之非也問使者此小物可弄何謂猛獸使者對曰夫威加百禽者不必繫之以大小是以神麟故爲巨象之王鸞鳳必爲大鵬之宗百足之蟲制於螭蛇亦不枉於巨細也臣國去此二十萬里國有常占東風入律百旬不休青雲千呂連月不散者當知中國有好道之君我王固將賤百家而貴道儒薄金玉而厚靈物也故搜奇蘊而貢神香步天林而請猛獸乘毳車而濟弱淵策

驥足以度飛沙契闊途遙辛苦蹊路於今已十三年矣神香起天殘之死疾猛獸却百邪之魅鬼夫此二物實濟衆生之至要助政化之昇平豈圖陛下反不知眞乎是臣國占風之謬矣今日仰鑒天姿亦乃非有道之君也眼多視則貪色口多言則犯難身多動則淫賊心多飾則奢侈未有用此四者而成天下之治也武帝愆然不平又問使者曰猛獸何方而伏百禽食噉何物膂力何比其所生何鄉耶使者曰猛獸所出或生崑崙或生元圃或生聚窟或生天路其壽不窮食氣飲露解人言語仁慧忠恕當其仁也愛獲蠢動不犯虎豹當其威也一聲叫發千人伏息牛馬百物驚斷縲繫武士奄然失其勢力當其神也立興風雲吐噉雨露百邪迸走蛟龍騰驚處於太上之廐役御獅子名曰猛獸蓋神光無常能爲大禽之宗主乃獲天之元王辟邪之長帥者也靈香雖少斯更生之神丸也疫病災死者將能起之及聞氣者卽活也芳又特甚故難歇也於是帝使使者令猛獸發聲試聽之使者乃指獸命喚一聲獸馳舛良久忽叫如天大雷霆靈又兩目如熾燄之交光光朗衝天良久乃止帝登時顛蹶掩耳震動不能自止侍者及武士虎賁皆失仗伏地諸內外牛馬豕犬之屬皆絕絆離繫驚駭放蕩久許咸定帝忌之因此獸付上林苑令虎食之於是虎聞獸來乃相聚屈積如死

虎伏獸入苑徑上虎頭溺虎口去十步已來顧視虎虎輒閉目帝恨使者言不遜欲收之明日失使者及猛獸所在遣四出尋討不知所止到後元元年長安城內病者數百亡者大半帝試取月支神香燒之於城內其死未三月者皆活芳氣經三月不歇於是信知其神物也乃更祕錄餘香後一旦又失之檢函封印如故無復香也帝愈懊恨恨不禮待於使者益貴方朔之遺語自愧求李君之不勤慙衛叔於楷庭矣明年帝崩於五柞宮已亡月支國人烏山震檀却死等香也向使厚待使者帝崩之時何緣不得靈香之用耶自合殞命矣

滄海島在北海中地方三千里去岸二十一萬里海四面繞島各廣五千里水皆蒼色仙人謂之滄海也島上俱是大山積石至多石象八石石腦石桂英流丹黃子石膽之輩百餘種皆生於島石服之神仙長生島中有紫石宮室九老仙都所治仙官數萬人居焉

方丈洲

方丈洲在東海中心西南東北岸正等方丈方面各五千里上專是羣龍所聚有金玉琉璃之宮三天司命所治之處羣仙不欲昇天者皆往來此洲受太元生籙仙家數十萬耕田種芝草課計頃畝

如種稻狀亦有玉石泉上有九源丈人宮主領天下水神及龍蛇巨鯨陰精水獸之輩

扶桑在

東海之東岸岸直陸行登岸一萬里東復有碧海廣狹浩汗與東海等水既不鹹苦正作碧色甘香味美扶桑在碧海之中地方萬里上有太常宮太真東王父所治處地多林木葉皆如桑又有堪樹長者數千丈大二千餘圍樹兩兩同根偶生更相依倚是以名爲扶桑仙人食其堪而一體皆作金光色飛翔空元其樹雖大其葉堪故如中夏之桑也但堪稀而色赤九千歲一生實耳味絕甘香美地生紫金丸玉如中夏之瓦石狀真仙靈官變化萬端蓋無常形亦有能分形爲百身十丈者也

蓬丘

蓬丘蓬萊山是也對東海之東北岸周迴五千里外別有圓海繞山圓海水正黑而謂之冥海也無風而洪波百丈不可得往來上有九老丈人九天真王宮蓋太真人所居唯飛仙有能到其處耳

崑崙

崑崙號曰崑崙在西海之戌地北海之亥地去岸十三萬里又有弱水周迴繞市山東南接積石圍西北接北戶之室東北接大活之井西南至承淵之谷此四角大山寔崑崙之支輔也積石圍南頭

是王母告周穆王云咸陽去此四十六萬里山高平地三萬六千里上有三角方廣萬里形似偃盆
下狄上廣故名曰崑崙山三角其一角正北干辰之耀名曰閼風巔其一角正西名曰元圃堂其一
角正東名曰崑崙宮其一角有積金爲天塘城面方千里域上安金臺五所玉樓十二所其北戶山
承淵山又有墉城金臺玉樓相鮮如流精之闕光碧玉之堂瓊華之室紫翠丹房錦雲燭日朱霞九
光西王母之所治也真官仙靈之所宗上通瑤璣元氣流布五常玉衡理九天而調陰陽品物羣生
希奇特出皆在於此天人濟濟不可具記此乃天地之根紐萬度之綱柄矣是太上名山鼎於五方
鎮地理也號天柱於珉城象綱輔也諸百川極深水靈居之其陰難到故治無常處非如丘陵可得
論耳乃天地設位物象之宜上聖觀方緣形而著爾乃處元風於西極坐王母於坤鄉昆吾鎮於流
澤扶桑植於碧津離合火生而光獸生於炎野坎總衆陰是以仙都宅於海島艮位名山蓬山鎮於
寅丑異體元女養巨木於長洲高風鼓於羣龍之位暢靈符於瑤丘至妙元深幽神難盡真人隱宅
靈陵所在六合之內豈惟數處而已哉此蓋舉其標末耳臣朔所見不博未能宣通王母及上元夫
人聖旨昔曾聞之於得道者說此十洲大丘靈阜皆是真仙隕墟神官所治其餘山川萬端並無觀

者矣其北海外又有鍾山在北海之子地隔弱水之北一萬九千里高一萬三千里上方七千里周旋三萬里自生玉芝及神草四十餘種上有金臺玉闕亦元氣之所舍天地居治處也鍾山之南有平邪山北有蛟龍山西有勁草山東有東木山四山並鍾山之枝幹也四山高鍾山三萬里宮城五所如一登四面山下望乃見鍾山耳四面山乃天帝君之城域也仙真之人出入道經自一路從平邪山東南入穴中乃到鍾山北阿門外也天帝君總九天之維貫無比焉山源周廻俱有四城之高但當心有觀於崑崙也昔禹治洪水既畢乃乘蹕車度弱水而到此山祠上帝於北阿歸大功於九天又禹經諸五嶽使工刻石識其里數高下其字蝌蚪書非漢人所書今丈尺數里皆禹時書也不但刻剡五嶽諸名山亦然刻山之獨高處爾今書是臣朔所具見其王母所道諸靈處禹所不履唯書中夏之名山爾臣先師谷希子者太上真官也昔授臣崑崙山蓬萊山及神州真形圖昔來入漢留以寄知故人此書又尤重於嶽形圖矣昔傳授年限正同爾陛下好道思微甄心內向天尊下降並傳授寶祕臣朔區區亦何嫌惜而不出所有哉然術家幽其事道法祕其師術泄則事多疑師顯則妙理散願且勿宣臣之意也

洞冥記 鈞影山

鈞影山去昭河三萬里有雲氣望之如山影丹藿生於影中葉浮水上有紫河萬里深十丈中有寒荷霜下方香盛有降靈壇養靈池分光殿五間奔雷室七間望蟾閣十二丈上有金鏡廣四尺元封中有祗國獻此鏡照見魑魅不獲隱形

西王母傳 崑崙

西王母所居宮闕在龜山春山西那之都崑崙之圃闔風之苑有城千里玉樓十二瓊華之闕光碧之堂九層元室紫翠丹房左帶瑤池右環翠水其山之下弱水九重洪濤萬丈非飈車羽輪不可到也所謂玉闕暨天綠臺承霄青琳之宇朱紫之房連琳絲帳明月四朗戴華勝佩虎章左侍羽童寶蓋沓映羽摻廕庭軒砌之下植以白環之樹丹闕之林空青萬條瑤榦千尋無風而神籟自韻琅琅然皆九奏八會之音也

博物志 神宮

神宮在高石沼中有神人多麒麟琪芝神草有英泉飲之壽三百歲乃覺不死去瑯琊萬五千里

員丘山

員丘山上有不死樹食之乃壽有赤泉飲之不老多夭蛇爲人害不得居也

搜神記 崑崙山

崑崙之墟地首也是惟帝之下都故其外絕以弱水之深又環以炎火之山山上有鳥獸草木皆生育滋長於炎火之中故有火澣布非此山草木之皮泉則其鳥獸之毛也漢世西域舊獻此布中間久絕至魏初時人疑其無有文帝以爲火性酷烈無含生之氣著之典論明其不然之事絕智者之聽及明帝立詔三公曰先帝昔著典論不朽之格言其刊石於廟門之外及太學與石經並以永示來世至是西域使人獻火浣布袈裟於是刊此論而天下笑之

搜神後記 始興機山

始興機山東有兩巖相向如鴟尾石室數十所經過皆聞有金石絲竹之響

拾遺記 三壺

三壺海中三山也一曰方壺則方丈也二曰蓬壺則蓬萊也三曰瀛壺則瀛洲也形如壺器此三山

上廣中狹下方皆如工製猶華山之似削成

浮玉山

西海之西有浮玉山山下有巨穴中有水其色若火晝則通曉不明夜則照耀穴外雖波濤濯蕩其光不滅是謂陰水當堯世其光爛起化爲赤雲丹輝炳映百川恬澈游海者銘曰沈燦以應火德之運也

扶桑

扶桑東五萬里有磅礴山上有桃樹百圍其花青黑萬歲一實鬱水在磅礴山東其水小流在大陂之下所謂沈流亦名重泉生碧藕長千常七尺爲常也條陽山出神蓬如蒿長十丈周初國人獻之周以爲宮柱所謂蒿宮也中有白橘花色翠而白實大如瓜香聞數里奏環天之和樂列以重霄之寶器器則有岑華鏤管睢澤雕鐘員山靜瑟浮瀛羽磬撫節按歌萬靈皆聚環天者鈞天也和廣也岑華山名也在西海上有象竹截爲管吹之爲羣鳳之鳴睢澤出精銅可爲鐘員山其形員也有大林雖疾風震地而林木不動以其木爲琴瑟故曰靜瑟浮瀛卽瀛洲也上有青石可爲磬磬者長一